

Durante comemento di despedida:

Colega Juby Naar: "I had to take the step"



ORANJESTAD (AAN) -- Diabierna personal di DIARIO, hunto cu nos dunador di Trabao sra. Nuhad Mansur, a bin hunto den un comemento ameno den e conference room, pa dispidi di nos colega Juby Naar. Juby Naar, despues di mas di 40 aña cu el a cumenza traha cu Jossy Mansur, den e Agencia Arubano di Noticia, di cual 38 aña consecutivo cu Matutino DIARIO, a sinti cu e momento a yega pa bay cas y cumenza un etapa mas trankil di su bida. E tabata un momento hopi agradable pero cu sentimentonan mixto, pasobra no ta facil pa dispidi di un colega di ken cada un di nos, di un of otro manera, a ricibi un guia, un conseho, un critica constructivo, y un joke cu no por a falta. Juby ta hiba cune graba den su curazon, un tiki di cada un di nos, y nos di dje. "E caranan aki, boso caranan" manera el a bisa cu hopi emocion cu a pone nos tene nos curazon. Juby tambe a dedica algun palabra y a splica pakico el a tuma e decision di stop di traha. E trabao mes e no ta sinti den dje manera antes mas, y un di e motibonan ta cansancio, y e no por keda di mainta te anochi manera den pasado. Cu palabranan hopi sincero el a expresa: "E no ta dreña mi mas y el a keda asina ey, y mi di no, ta tempo pa mi baha e cabes un poco, sosega na bon of na malo, mi no por mas! Esey a pone cu mi a dicidi cu mi no ta keda mas. I had to take the step"! "Mihor colega, mi no por tabata tin, manera boso tur. Danki! Danki pa a soporta e pesadiya. Mi ta sinti aki ainda, mi por a bay basta tempo pasa pero mi no a bay pasobra di tur e departamentonan di DIARIO te na Gerencia, erornan cu mi a comete y tur esey boso a scapa mi y pone mi na trabao ainda. Si no ta pa boso lo mi a bay hopi aña pasa y na malo y no na bon. Danki na boso tur. DANKI!" Señora Mansur a gradici Juby pa su añanan di bon trabao y lealtad pa DIARIO. Nos como colega ta desea Juby Naar tur sorto di exito y pa e no bay mucho leu. DIARIO ta keda su cas.